

PARTORDING ACARA TAON NA IMBARU

📖 **Ev: Mateus 25 : 24 – 30**

📖 **Ep: Jeremia 17 : 7 - 8**

**TOPIK:
GABE NAPOSO HAPOSAN**



Rabu, 01 Januari 2025

I. PANGARADEON:

1. Angka na martugas dohot Parhalado mangarade ma di konsistori laho prosesi.
2. Prosesi mamongoti gareja laos jongjong ma di jolo ni langgatan mangadop tu ruas.

II. PARMINGGUON: [U = Uluan; R = Ruas]

01. Joujou tu Parsaoran:

U : Huria ni na hinaholongan ni Tuhanta, tapuji ma Debata Ama, AnakNa Tuhan Jesus Kristus dohot Tondi Parbadia naung paloashon hita mamolus taon 2024 naung salpu i jala naung mangalehon taon 2025 on tu hita. Sialani pasahatonnnami ma tu hita saluhutna: SELAMAT TAON BARU MA DI HITA SALUHUTNA.

R : SELAMAT TAON BARU MA NANG DI HAMU.

U : Pardenggan basa do Jahowa di saluhutna. Jala di linggomi asi ni rohaNa do jadijadianNa sudena.

R : Olophon ma Jahowa ale sandok tano on, huoloi hami ma Jahowa marhitehite las ni roha, ro be ma hami tu joloNa marhitehite olopolop.

U : Antong, marolopolop jala marlasniroha ma hita marsomba tu Debata, tapaunduk ma rohanta, tapaloas ma Debata mian dibagasan parsaoranta di tingki on. Marende ma hita!
(Tingki marende, mulak ma Parhalado tu ingananna be)

02. Marende BE No. 70 : 1 - 3 "NAUNG SALPU TAON NA BURUK I "

♫♫ Naung salpu taon na buruk i, Ho ma hupuji Tuhanhi
Ai diramoti Ho tongtong tondingku dohot dagingkon
Ai diramoti Ho tongtong tondingku dohot dagingkon.

♫♫ O Jesus sai asi rohaM, paian denggan ni basaM
Muse di taon na'mbaru on di nasa huriaM tongtong
Muse di taon na'mbaru on di nasa huriaM tongtong.
-----Musik----- *(Jongjong)*

♫♫ Sai tong paian hataMi na mangapuli roha i
Alai pangago sasude padao ma sian hami be
Alai pangago sasude padao ma sian hami be.

03. Votum~Introitus~Tangiang:

U : Marhitehite goar ni Debata Ama, dohot goar ni AnakNa Tuhan Jesus Kristus dohot goar ni Tondi Parbadia na tumompa langit dohot tano on. Amen. Ahu do Alpha, Ahu do Omega, bonana dohot ujungna ninna Tuhan i, na adong dohot naung adong hian dohot na ro. Pargogo na sumurung. HALELUYA!

R : *(Mangendehon) Haleluya! Haleluya! Haleluya!*

U : **Martangiang ma hita**: Ale Tuhan Debata! Sian asi ni rohaM do umbahen sahat hami tu taon na imbaru on; Ho do na mangaramoti hami di bagasan taon na salpu i. Sai asi ma rohaM, sai unang tulak hami nuaeng, sai dongani ma hami di bagasan taon na imbaru on. Pasupasu hami ro di angka ulaon na denggan, na huula hami marhitehite GoarMu. Alai na gumodang, pasupasuhon ma HataM na badia i tu rohanami, asa gabe na imbaru rohanami, asa tarpamasuk Ho hami tu banua ginjang di hasusuda ni bohalnami. Amen. *(Hundul)*

04. Marende BE. No. 69 : 5 "JESUS SAI URUPI HAMI" BL.84

♫♫♫ Sai pagomos ma rohangku manundalhon dosa i
Lam paganda ma ringgashu manguilahon patikMi
Asa unang rohangkon lalap di portibi on.

05. Patik:

U : Tangihon hamu (Tatangihon) ma Patik ni Debata di hita sadari on i ma na tarsurat di **Lukas 16 : 10**, "Ia haposan halak di na umotik, haposan ma ibana nang di na godang: Ianggo geduk ibana di na umotik, geduk ma nang di na godang".
I do sahatna. Antong, rap mangido gogo ma hita sian Tuhan Debata!

U+R : Ale Tuhan Debata sai pargogoi ma hami manguilahon na hombar tu PatikMi. Amen.

06. Marende BE. No. 64 : 2 + 4 "NAUNG MORU DO MUSE SATAON" BL.192

♫♫♫ Aut alusanhu Debatanku, ra tung maila au disi
Marningot salpu ni rohangku ro di sude ulaonhi
Ai dosa do binaen ni tangan, gok dosa nang rohangku pe
Nang pat nang mata, nang pamangan luhut marsala do hape.
(Jongjong)

♫♫♫ Nandang dapot bilanganku dosa naung huulahon nasailaon
Huhut ndang harajuman basa ni Tuhan Jesus nasailaon
Nandang dibaloshon Ho, Tuhanku tu au hombar tu dosangki
Sai dipalambas Ho rohaMu, marnida pangalahongki

07. Tangiang Manopoti Dosa:

U : Tatopoti ma dosanta. Martangiang ma hita : Ale Tuhan Debata, na badia jala na bonar. Parasi jala Partalup ni roha jala na basar do Ho! Sai marpangulahi ma rohaM mida hami. Dibahen i sai sesa ma sude dosanami! Nandang adong na hupangasahon hami dungkon ni asi ni rohaM; hatigoran na pinatupa ni AnakMu do na hupangasahon hami tu joloM. Dibahen i pasonang jala apuli ma hami angka na hinophop ni Tuhan Jesus Kristus, Tuhannami. Amen.

Bagabaga ni Debata Taringot tu hasesaan ni dosa:

Munsat pe angka dolok, jala humuntal angka robean, alai anggo parasi ni rohangHu na so tupa munsat sian ho, jala padan ni hadameonHu na so tupa humordit, ninna Jahowa Siasii ho. Hasangapon ma di Debata na di ginjang!

R : Amen.

(Hundul)

08. Marende BE. No. 63 : 2 "JESUS HO DO SAI TONGTONG"

♫♫♫ Nang goarMu nang hataM, ingkon dapot do begeon
Di bagasan huriaM, na girgir lao paradehon
Roha ni ruasNa i, bahen bagus joroMi.

09. Epistel: (U: Uluan; R: Ruas; S : Sude)

U : Tabege ma hata ni Debata turpuk dibagasan sadarion i ma na tarsurat di **Jeremia 17 : 7 - 8**, marsingkat sorin ma hita manjahasa: Alai martua ma baoa na marhaposan tu Jahowa, jala Jahowa haporusanna dibahen.

R : Tudos do ibana tu hau na sinuan di topi ni batang aek, jala manjarar uratna di lambung batang aek, jala ndang mabiar ibana molo ro hamohopon, jala tongtong rata bulungna, jala ndang holsoan ibana di taon haraharon, jala ndang mansohot marparbue.

U : I do sahatna. *Martua ma angka na tumangihon Hata ni Debata, jala na umpeopsa.*

S : Amen.

10. Marende BE.No.649 : 1 - 2 "DIPASADA AMA I " BL. 649

♫♫♫ Dipasada Ama i, angka na porsea i
ni rahutan ni holong ni Kristus i, marhite TondiNa i.

(Jongjong)

♫♫♫ Las roham endehon ma, holong i radoti ma
Sauduran hita na porsea i, di Tuhanta Jesus i.

11. Manghatindanghon Haporseaon

U : Tahatindanghon ma haporseaonta i, songon na hinatindanghon ni donganta sahaporseaon di sandok portibion, rap ma hita mandok:

R : Ahu Porsea di d.u.

(Hundul)

12. K O O R

13. Sunggul-sunggul

14. K O O R

15. ACARA TAON BARU:

- a. Selamat Taon Baru mewakili Ruas.
- b. Selamat Taon Baru mewakili Pangaranto.
- c. Selamat Taon Baru mewakili Parhalado

16. Papungu Pelean Huhut Marende BE. HKBP No. 672 : 1 - 3 “TUNG GODANG SITUTU” (Pelean Ia & Ib)

♫♫♫ Tung godang situtu ulaonmu antong, dipasahat Tuhanta tu ho
Ndang adong be tingkim marnalemba tahe, ngolumi bahen tiruan tongtong
Sai patupa ma i, ala ni Tuhan i, so manghirim balosna tu ho
Debata do marnida na niulami, manang na adong parbue ni i.

♫♫♫ Ai lambok do soara ni Tuhanta i, ro ma ho las ma nang rohami
Sai taingot tongtong hata ni Tuhan i, mangarahonjolma tu Tuhan i
Sai patupa ma i, ala ni Tuhan i, so manghirim balosna tu ho
Debata do marnida na niulami, manang na adong parbue ni i.

-----Musik-----

♫♫♫ Alanji boan ma, sondang na tiur i, boan ma hata ni Tuhan i
Sai urupi na pogos na mardangol i, asa ro tu Jesus Tuhanta i
Sai patupa ma i, ala ni Tuhan i, so manghirim balosna tu ho
Debata do marnida na niulami, manang na adong parbue ni i.

17. Jamita: Mateus 25 : 24 – 30

18. Papungu Pelean Huhut Marende BE. HKBP No. 66 : 1 – 3 ”DEBATA BAEN DONGANMI ” (Pelean II)

♫♫♫ Debata baen donganmi, lao mangula ulaonmu
Baen Ibana haposanmu sai paserep rohami
Debata baen donganmi Debata baen donganmi.

♫♫♫ Debata baen donganmi molo Debata donganmu
Ndang tarbahen ho be lilu sai ture do langkami
Debata baen donganmi, Debata baen donganmi.

-----Musik-----

♫♫♫ Debata baen donganmi sai na saut do ulaonmu
Sai na tulus do sangkapmu jala sonang rohami
Debata baen donganmi, Debata baen donganmi.

19. Pangujung :

(Jongjong)

U : Gabe naposo na haposan ma hita dingolunta, jala Debata ma na paborhathon hita tu
sude ulaonta dibagasan taon 2025 on, ala didok Ibana do: “Unang ho mabiar, ai Ahu

do donganmu! Unang ho biahaton, ai Ahu do Debatam. Ahu margogoihon ho huhut mangurupi ho, huhut maniopi ho marhitehite siamun ni hatigoranHu” (Jesaya 41 : 10)

R : Ale Jahowa, ho do Debatanku, sai patimbulonku do Ho, pujionku do goarMu, ai nunga mambahen halongangan Ho; angka sangkapMu sian narobi pe na bonar jala na sintong do.

S : (Mangendehon): BE No. 758 : 2 “JAHOWA PANGURUPI” BL.758

♫♫♫ Jahowa las ni roha saleleng ngolumi
Ibana haroroan ni nasa na uli
Ai disarihon Jesus sude naringkot i,
Halashon panoguon ni Jesus Tuhanmi.

U : Tapasahat ma peleanta tu harajaon ni Debata, martangiang ma hita! Ale Debata, Amanami na di banua ginjang! Ho do haroroan ni saluhut silehonlehon na denggan dohot nasa ulibasa na mauliutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hami pelean on, patimbulhon harajaonMu di tongatonga ni huriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauliate tu Ho, marhitehite Jesus Kristus Tuhannami. Amen

R : (Mangendehon) BE No. 204 : 2 “Ndang Tadinghononhu Ho”

♫♫♫ Nasa na nilehonMi, tondi ro di pamatanghu.
Hosa dohot gogongki, ro di saluhut artanghu.
Hupasahat i tu Ho, na so unsatonhu do.

U : Ale Tuhan Debata, na so marmula na so marpansohotan, Debata na manongtong ro di saleleng ni lelengna! Na so olo suda do angka taonMu, jala ndang marparbolatan angka ariariM; alai jempek jala na gabur salpu do taonnam dohot ariarinami. Nunga salpu muse sada taon sian ariarinami, alai ndang salpu ianggo asi ni rohaM. Dibahen i hupuji hami Ho marhitehite Tuhan Jesus Kristus Tuhannami, ala ni godang ni asi ni rohaM na pasahat hami tu bona ni taon on. Mansai godang do denggan ni basaM hujalo hami manipat taon na salpu i, jala huingot hami do i sadari on. On pe mauliate ma rohanami tu Ho, ala dipangolu jala diramoti Ho hami; dilehon Ho sipanganon dohot paruloson di hami jala dipasupasu Ho na niula ni tangannami. Angkup ni i dilehon Ho do hasonangan tu luatnami, jala dipalua Ho do hami sian parmaraan, jala diramoti Ho do hami di hagogotan. Tongtong do dilehon Ho Barita na Uli i manondangi hami asa sanga hami paubahon rohanami. Angkup ni i dilehon Ho do apulapul tu na marsak, tu na matean, asa unang mandele nasida. Molo huingot hami sude pambahenannami di taon naung salpu i, na maila do hami nuaeng maradophon ho, ala jotjot magopo

ariarinami dohot asi ni rohaM hubahen hami. On pe binsan disalpuhon Ho nuaeng taon naung salpu i sian hami, salpuhon ma sude pambahenannami na hurang i, jala sesa sude dosanami. Sai huphupi ma pambahenannami na hurang i, marhitehite asi ni rohaM. Diebati Ho do hami manipat na sataon i, jala diida Ho do lan na so marparbue na denggan di tongatonganami. Sai unang jolo taba, sai pasombu ma hami mangolu, anggiat marparbue na denggan hami tu joloan on. Huparhatopot hami do sude asi ni rohaM jala di bagasan haserepon dohot unduk ni roha do hami nuaeng mangido tu Ho; Sahat tu Ho ma hami on sude. Sai togutogu jala ramoti ma hami on sude. Sai togutogu jala ramoti ma hami di bona ni taon on, songon i ganup ari, asa pujionnami Ho di taon na ro on. Patuduhon ma ganup ari tu hami dalam sidalanannami dohot ulaon siulaonnami. Sai pasupasu ma hami jumpa marpungu di bagasMon, di parsikolaan, songon i dohot di bagasnami be. Sai tumpahi sude parjamita, pangajari dohot na paturehon na marsahit, songon i dohot na pinasahat tu nasida. Sai ramoti ma na manggomgomi hami. Tatap ma saluhut na tarsosak, na pogos, na dangol, na so marama, na nileaan ni halak. Unang loas nasida hona rupa, alai patuduhon ma tu nasida asi ni rohaM na so mansohot i, asa rap marlas ni roha hami sogot di hasonangan di lambungMu di inganan na hot, ala ni AnakMu, Tuhan Jesus Kristus, Tuhannami. Amen.

Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu hami! Unang hami togihon tu pangunjunan! Palua ma hami sian pangago!

R : (Mangendehon):

♪♪♪ Ai Ho do nampuna harajaon, dohot hagagoon.
Ro di hasangapon, saleleng ni lelengna, Amen

U : Tangiang Pasupasu!

R : (Mangendehon) Amen, Amen, Amen